

Nowodhow an Seythen

18/11/08

Kaskyrhor gwiryow kethreythek a-vri re sevis a-barth gwiryow Kernow.

Peter Tatchell a skrifas koloven y'n Guardian der an kesrosweyth yn unn skodhya agan pow ni.

Ev a leveris bos lowr dhyn rag kavos lahys omserghyek.

Byttegyns yma an awtoritys orth agan naha.

Esel Senedh Westminster rag Truru re skrifas yn unn worthybi.

Matthew Taylor a grys bos kudynnnow Kernow aswonnys gans Mester Tatchell, mes ny wra ev skodhya tybyans a wovernans omserghyek Kernow.

**

Pyskador re verwis wosa droglam war y gok war arvor Syllan.

Gwithysi-vor Aberfal a lever y vos Spaynek... hag y feu skwattyes war y benn gans daffar poes.

**

Ottomma an drevesogyon a Gernow na vynnys bythkweyth kavos barga-tir gwyns y'ga hyrhyn.

Lemmyn ha pymthek bledhen wosa igerans Krows Korflan, yma towl dhe'n berhenoryon drehevel turbinyow nowyth... ha diwweyth a'ga braster.

Nerth Alban a garsa gul barga tir teyrgweyth brassa keffrys.

**

Yma own dhe skoedhoryon a'gan gonisyow tan bos yn-dann wodros arta.

Paper sodhek a gynik dhe'n konsel trehi oberi a-hys an nos yn Aberfal may hallo bos an mona spenys yn Lyskerrys.

An konsel a lever bos henna tybyans profys yn paper kusulya ha nyns eus ervirans hwath.

Ha ni ow kewsel a-dro dhe'n gonis tan... eseli an lu a geskerdhas yn Loundres y'n seythen yw passyes yn unn wovyn moy a arhans.

Y teu hemma moy es unn vledhen wosa tan dhe vos gorrys yn Ostel Pennhalow yn Tewyn Bleustri.

**

Nebes trethow re wrug fyllel assayansow dader dowr.

Nyns o nivellow da lowr dhe Seythyn, Logh, Readymoney, Porthluney and Karrek.

Dowr Soth West a guhudh meur a law y'n hav.

**

Kopel dhyworth Tewyn Bleustri re dhros aga demedhyans dh'y benn yn bewnans gwir wosa romans war-linen.

Yma Amy Pollard ha'y gour David ow falsa awos bys kesrosweyth henwys Second Life... po nessa bewnans.

Hi a lever bos an den dew-ugens bloodh y oos dhe wari gans ken venyn... kyn na wrug ev nevra hy gweles yn bewnans kynsa.

**

Sport...

Dy'Sul y kwerryas an Vorladron erbynn Leeds Carnegie – ow tos ha bos ogas lowr dhe gachya an argh-para a genedhlek onan.

Byttegyns an battle o re vras ha'n diwettha skor o pypm warn ugens dhe dri warn ugens.

**

Kenedhlek dew... ha'n Para Oll Du a feth Kargront ...onan warn ugens dhe dri warn ugens.

Ha peswar fit warbarth yw dhe bara Bay an Menydh.

I a fethas Southend dew ugens dhe bymthek.

Ha'n Rudhyon a bes y'ga hyns heb koll.

Hwath ymons orth penn an voos wosa fetha Tynedale... pymthek dhe bymp.

**

Hag ottani orth diwedh a'gan bulletin.

Agas gweles nessa seythen.